

## **Saya tidak tolak Raja-raja Melayu**

**SINAR HARIAN**

**8 JUN 2018**

**NURUL RIDUAN NOR ASHAHA**

PUTRAJAYA - Perdana Menteri, Tun Dr Mahathir Mohamad menjelaskan apa yang beliau lakukan terhadap Raja-raja Melayu sebelum ini bukanlah bermakna beliau menolak institusi diraja.

Sebaliknya beliau berkata, apa yang dilakukan itu hanyalah mahu mengelakkan daripada raja-raja menimbulkan rasa marah rakyat sehingga rakyat memberontak.

Katanya, ini termasuklah menggubal undang-undang bagi menubuhkan Mahkamah Khas Raja-Raja.

“Kita kena jaga, raja janganlah terlibat dengan benda-benda yang rakyat tidak suka. Rakyat tiada kuasa, tetapi bila dia dah marah, dia akan memberontak. Jangan jadi macam ini.

“Jadi kita kena elak raja dengan kebesarannya itu supaya tidak tercemar. Saya bukan menolak raja-raja tetapi saya berpendapat bahawa kalau raja buat sesuatu yang salah, patutlah kita ambil tindakan iaitu menyelamatkan raja.

“Macam kita ada undang-undang yang kita gubal sehingga tertubuhnya mahkamah khusus untuk raja-raja,” katanya dalam sesi wawancara eksklusif bersama Sinar Harian di Yayasan Kepimpinan Perdana, semalam.

Beliau berkata demikian ketika menjawab soalan apakah yang beliau lakukan untuk menjamin hubungan baik antara raja, pentadbir negara dan rakyat.

Pada 1993, Parlimen telah meminda Perkara 182 Perlembagaan Persekutuan yang berkaitan dengan kekebalan Raja-raja Melayu. Melalui pindaan itu, Mahkamah Khas Raja-Raja ditubuhkan dan berkuat kuasa pada 30 Mac 1993.

Katanya, berhubung kelewatan angkat sumpah sebagai Perdana Menteri, beliau berkata, raja-raja perlu mematuhi undang-undang dan Perlembagaan Negara.

“Perkara macam itu tidak harus berlaku. Kita ada undang-undang. Kita ada perlembagaan. Kita kena akur kepada undang-undang. Kita nak kembali kepada 'the rule of law'. Apabila sesuatu yang berlaku tidak mengikut undang-undang, maka akan menimbulkan kemarahan.

“Tetapi saya fikir raja-raja sedar kerana ramai raja-raja yang berusaha supaya mereka semua dan Agong patuh kepada undang-undang.

“Sebenarnya majoriti raja-raja tidak bersetuju kalau dilewat-lewatkan pelantikan itu. Ada yang datang jumpa saya, ada yang cuba meredakan keadaan, termasuk kelewatan saya angkat sumpah dan juga soal pelantikan Peguam Negara. Dan ini sudah diselesaikan atas nasihat raja-raja sendiri,” katanya.

Kelmarin, Tommy Thomas dilantik sebagai Peguam Negara menggantikan Tan Sri Mohamed Apandi Ali yang dipecat sebaik sahaja perdana menteri menasihatkan Yang di-Pertuan Agong, Sultan Muhammad V berbuat demikian.

**© 2018 All Rights Reserved • Karang kraf Group Media • © 2018 Hakcipta  
Terpelihara • Kumpulan Media Karang kraf**

Source: <http://www.sinarharian.com.my/nasional/saya-tidak-tolak-raja-raja-melayu-1.843762>